

Perbetul fahaman serong naratif martabatkan bahasa Melayu

- Perdana Menteri, Datuk Seri Anwar Ibrahim menegur sebahagian elit fobia terhadap bahasa Melayu, terlalu mengagungkan bahasa Inggeris serta terlalu ghairah dan obses terhadap penguasaan bahasa Inggeris dalam hidup

- Perdana Menteri menyeru kepada usaha bersama, termasuk sektor swasta memperkasa bahasa Melayu dalam kehidupan seharian, sambil terus mengiktiraf kepentingan bahasa Inggeris dalam konteks sesuai



Oleh Datuk Dr Anwar Ridhwan
bhrencana@bh.com.my

Beberapa hari lalu, bekas Ahli Parlimen Bangi, Dr Ong Kian Ming, dilaporkan mengkritik Perdana Menteri, Datuk Seri Anwar Ibrahim kerana dikatakan membentangkan naratif negatif dan bukannya naratif positif berkenaan penggunaan bahasa Melayu.

Kian Ming dipetik sebagai berkata, 'mereka menggunakan bahasa Inggeris dalam pelbagai kehidupan harian mungkin berbuat demikian atas sebab lain dan bukan kerana memperkecilkan penggunaan bahasa Melayu atau mereka

memperlekehkan penggunaan bahasa Melayu dalam tetapan rasmi'.

Menurut bekas pemimpin DAP itu lagi, Anwar seharusnya memberikan naratif positif mengenai penggunaan bahasa Melayu, bukan menekankan perkara yang negatif kerana ini akan menggalakan lebih ramai orang untuk menggunakan bahasa Melayu kerana ia adalah untuk manfaat mereka, bukan kerana paksaan.

Bagaimanapun, kritikan Kian Ming terhadap ucapan Anwar pada Majlis Perasmian Sambutan Bulan Bahasa Kebangsaan Bersempena dengan Dekad Bahasa Kebangsaan (DBK) 2024 sebenarnya adalah tidak perlu kerana tidak berasas.

Sebagai seorang terpelajar mempunyai ijazah doktor falsafah (PhD), Kian Ming tidak boleh memberi komentar berdasarkan liputan media semata-mata, sebaliknya perlu mendengar keseluruhan ucapan dan memahami konteks penuh disampaikan Perdana Menteri.

Dalam ucapan itu, Perdana Menteri menegaskan betapa pentingnya penguasaan pelbagai bahasa utama dunia, termasuk bahasa Inggeris, Mandarin, bahasa Tamil dan bahasa Arab tanpa menyetepikan kedudukan utama bahasa Melayu sebagai bahasa kebangsaan.

Jelas dalam ucapan Anwar, penegasan mengenai kepentingan bahasa Inggeris antaranya ialah:

- 'Saya antara menekankan keperluan penguasaan bahasa Inggeris dalam dunia mencabar'.
- 'Tidak ada negara kian meningkat maju akan menyisihkan mana-mana bahasa utama di dunia'.
- 'Tidak ada sesiapa dan saya tidak mewakili pendapat mahu mengurangkan penekanan atau meremehkan kepentingan bahasa Inggeris'.

Kian Ming sebaliknya hanya menumpukan kepada satu bahagian dalam ucapan Anwar yang mana beliau menyebut mengenai 'sikap sebahagian elit' terlalu taasub dengan bahasa Inggeris sehingga

meminggirkan bahasa Melayu.

Apa yang ditegur Anwar hanya sikap sebahagian elit mempunyai fobia terhadap bahasa Melayu, terlalu mengagungkan bahasa Inggeris serta terlalu ghairah dan obses terhadap penguasaan bahasa Inggeris dalam hidup.

Ini bukan serangan terhadap semua pengguna bahasa Inggeris seperti disangka Kian Ming, tetapi lebih kepada peringatan kita tidak seharusnya melupakan bahasa Melayu sebagai bahasa kebangsaan, walaupun ingin menguasai bahasa Inggeris dan bahasa lain.

Inilah disebutkan Anwar: "Mereka mungkin dibesarkan di London, tapi saya nak ingatkan mereka, hidup mereka di Malaysia dan mereka bertanggungjawab bukan dalam kalangan kelompok elit kecil, tapi mereka mesti mewakili hasrat dan aspirasi rakyat Malaysia keseluruhannya."

Tunjang identiti nasional dan perpaduan

Perdana Menteri menekankan memartabatkan bahasa Melayu tidak bermaksud menyetepikan bahasa Inggeris, sebaliknya kedua-dua bahasa ini memainkan peranan penting dalam pembangunan negara.

Penguasaan bahasa Inggeris adalah perlu dalam konteks ekonomi dan komunikasi antarabangsa, manakala bahasa Melayu pula tunjang identiti nasional dan perpaduan.

Justeru, kerajaan menubuhkan Dewan Bahasa dan Pustaka (DBP) sejak 1956 bagi membina dan mengembangkan bahasa Melayu sebagai bahasa kebangsaan, bahasa ilmu pengetahuan dan penyatuan kaum negara ini.

Ini adalah satu kenyataan relevan dan tepat, terutama dalam konteks Malaysia pelbagai budaya dan bahasa. Anwar ingin mengingatkan penguasaan bahasa Melayu penting untuk memastikan perpaduan nasional, sementara penguasaan bahasa Ing-

"Perdana Menteri menekankan martabatkan bahasa Melayu tidak bermaksud menyetepikan bahasa Inggeris, sebaliknya dua bahasa ini memainkan peranan penting dalam pembangunan negara"

geris penting untuk mencapai kejayaan dalam ekonomi dan bidang lain.

Sikap ditekankan Anwar adalah untuk mencapai keseimbangan. Hendak maju, Malaysia tidak boleh menyisihkan mana-mana bahasa, tetapi pada masa sama, tidak boleh lupa bahasa Melayu adalah bahasa kebangsaan dan kedudukannya dalam Perlembagaan tidak boleh dipertikai.

Bagi Anwar, cabaran utama perlu dihadapi adalah memastikan setiap rakyat Malaysia, tanpa mengira latar belakang kaum atau status sosial, dapat bersatu di bawah satu bahasa kebangsaan, sambil tidak menyetepikan keperluan penguasaan bahasa lain.

Apa yang mungkin tidak difahami Kian Ming adalah Anwar tidak menafikan keperluan penguasaan bahasa Inggeris, tetapi beliau lebih menekankan bahasa Melayu sebagai bahasa rasmi harus terus diperkasakan.

Perdana Menteri menekankan ini bukan masalah bagi rakyat biasa, tetapi lebih kepada sebahagian kecil elit 'tercabut daripada akar tradisi, budaya, bangsa dan negara'.

Kritikan Kian Ming seolah-olah menuduh Perdana Menteri melabel pengguna bahasa Inggeris sebagai 'golongan elit' sebenarnya tidak tepat. Anwar tidak menyerang mereka yang menggunakan bahasa Inggeris dalam urusan harian, terutama dalam sektor korporat, akademik atau perkhidmatan awam.

Anwar secara jelas menyatakan penguasaan pelbagai bahasa, termasuk bahasa Inggeris adalah satu aset. Apa yang dikritik Anwar adalah sikap golongan elit terlalu taasub dengan bahasa Inggeris sehingga memandang rendah penggunaan bahasa Melayu.

Kian Ming juga memetik beberapa contoh bahasa Inggeris digunakan secara meluas dalam mesyuarat syarikat tersenarai dan persidangan akademik, namun Anwar tidak pernah mencadangkan bahasa Melayu digunakan dalam semua situasi ini.

Sebaliknya, Perdana Menteri menyeru kepada usaha bersama, termasuk sektor swasta untuk memperkasa bahasa Melayu dalam kehidupan seharian, sambil terus mengiktiraf kepentingan bahasa Inggeris dalam konteks sesuai.

Secara ringkas, kritikan Kian Ming terhadap ucapan Anwar tidak berasaskan kepada pemahaman penuh mengenai konteks ucapan berkenaan.

Anwar bukan sahaja mengiktiraf kepentingan penguasaan bahasa Inggeris, tetapi juga menekankan bahasa Melayu perlu diperkasakan sebagai bahasa kebangsaan menghubungkan semua rakyat Malaysia.

Ini bukan soal pemaksaan, tetapi tanggungjawab bersama untuk memastikan perpaduan nasional dan pembangunan budaya berteraskan identiti sebagai rakyat Malaysia.

Semua artikel penulis tamu adalah pendapat peribadi, bukan pendirian rasmi BH